

**Nota Saban-Muphôm**  
**antara**  
**Peumeurintah Republik Indonesia**  
**dan**  
**Geurakan Atjèh Meurdéhka**

Peumeurintah Republik Indonesia dan Geurakan Atjèh Meurdéhka (GAM) geupeuteugaih djandji banduwa pihak untôk geupeuseuleusoë konflik Atjèh deungòn tjara damè, dalam banmandum hai, beumeusambông dan beumeumarwah keubandum.

Banduwa pihak keubit geumeukeusud beutimoh situasi sampoe lahé saboh peumeurintahan rakjat Atjèh meulaluwi proses njang adé dan demokratik dalam neugara keusatuan dan konstitusi Republik Indonesia.

Banduwa pihak that yakin bahwa deungòn tjara damé sagai djeuët tapeubeudòh keulai sampoë meuhasé Atjèh njang ka hantjô meusabab nibak Tsunami 26 ub Désèmber 2004,.

Banduwa pihak njang mupaké dalam konflik njoë ka seupakat geupeudong rasa saléng peutjaja. Nota Saban-Muphôm njoë meupeutrang asoë seureuta prinsip-prinsip janji njang djeuët keumeuneumat proses transformasi.

Keutrôk bak makeusud njan Peumeurintah RI dan GAM ka seupakat dalam hai<sup>2</sup> sibagoë di mijub njoë:

**1. Peumeurintahan Atjèh**

**1.1. Undang<sup>2</sup> keuhai Peudjak Peumeurintahan Atjèh**

1.1.1. Saboh undang<sup>2</sup> barô teuntang Peumeurintahan Atjèh akan teupeugòt dan akan teupeudjak sisigra mungkn dan handjeuët liwat nibak 31 ub Marèt 2006.

1.1.2. Undang<sup>2</sup> barô teuntang Peumeurintahan Atjèh njan akan teupeugòt meunerôt prinsip<sup>2</sup> di mijub njoë:

- a) Atjèh akan geupeudjak kuwasageuh dalam bandum uròsan keuneugara-an, njang akan geupeudjak meusigò deungòn administrasi sipil dan mahkamah, keutjuali dalam bideuëng hubôngan luwa nanggroë, pertahanan luwa, keamanan nasional, hal ikhwal moneter (mata pèng) dan fiskal (padjak-tjukai), kekuwasa-an kehakiman dan kebebasan beragama, njang teuduëk

di mijub tanggông djaweuëb Peumeurintah Republik Indonesia seusuai deungòn Konstitusi.

- b) Persetujuan<sup>2</sup> internasional njang geupeudjak uléh Peumeurintah Indonesia njang meusangkôt deungòn hal-ikhwal keupeunténgan khusus Atjèh djeuët geupeudjak deungòn tjara musjawarah dan ateuéh izin legislatif (dewan waki rakjat) Atjèh.
- c) Peunutôh<sup>2</sup> Dewan Perwakilan Rakyat Republik Indonesia njang meusangkôt deungòn Atjèh akan geupeudjak deungòn musjawarah dan ateuéh izin legislatif Atjèh.
- d) Langkah<sup>2</sup> administrasi njang geutjok uléh Peumeurintah Indonesia njang meusangkôt deungòn Atjèh akan geupeugòt deungòn tjara musjawarah dan ateuéh izin Ulèë Peumeurintah Atjèh.

- 1.1.3. Nan Atjèh dan geular peudjabat<sup>2</sup> senior piléhan rakjat, akan geupeuteuntèë uléh legislatif Atjèh lheuëh peumiléhan<sup>2</sup> umum njang ukeuë.
- 1.1.4. Tjeuë bataih Tanoh Atjèh nakeuh lagèë njang na bak tjeuë bataih 1 ub Djuli 1956.
- 1.1.5. Atjèh na hak untôk geungui lambang<sup>2</sup> wilayah teumasôk beundéra, lambang nanggroë dan himne (lagu naggroë).
- 1.1.6. *Kanun* Atjèh akan geupeu-udép keulaji untôk Atjèh deungòn geupeujum tradisi seudjarah dan adat-istiadat bansa Atjèh lagèë meuh'eut hukôm Atjèh masa djinoë.
- 1.1.7. Leumbaga *Wali Nanggroë* akan geupeuna deungòn bandum peurangkat upatjara dan geulargeuh.

## **1.2. Partisipasi Politik**

- 1.2.1. Sisigra mungkné meutapi handjeuët leubèh trép nibak sithôn mulai dari watèë geutanda-djaroë Nota Saban-Muphôm njoë, Peumeurintah RI seutudju dan akan geubri fasilitas untôk peudòng peureuté<sup>2</sup> politik njang meuasai di Atjèh njang sép sjarat<sup>2</sup> nasional. Teumeuphôm h`eut bansa Atjèh supaja djeuët na peureuté<sup>2</sup> politik lokal di Atjèh, maka Peumeurintah RI, dalam masa sithôn, atawa paléng teulat 18 buleuën dari watèë geutanda-djaroë Nota Saban Muphôm njoë, akan geupeuna situasi politik dan hukôm supaja djeuët teudòng peureuté<sup>2</sup> politik lokal di Atjèh deungòn geumupakat deungòn Dewan Perwakilan Rakjat. Peudjak buët njang paih-watèë Nota Saban-Muphôm njoë, akan meubantu peutrôk meukeusud njan.
- 1.2.2. Deungòn geutanda-djaroë Nota Saban-Muphôm njoë, bansa Atjèh na hak peutamòng tjalon<sup>2</sup> peudjabat njang akan geupiléh uléh rakjat dalam peumiléhan umum di Atjèh bak buleuën April 2006 dan ukeuë njan lom.

- 1.2.3. Peumiléhan lokal njang bibeuëh dan adé akan geupeudjak di mijub Undang<sup>2</sup> barô Peumeurintahan Atjèh, untôk geupiléh Ulèë Peumeurintah Atjèh dan peudjabat<sup>2</sup> laén bak buléuën April 2006 seureuta untôk geupiléh angèëta legislatif Atjèh bak thôn 2009.
- 1.2.4. Sampoë thôn 2009, legislatif (DPRD) Atjèh handjeuet geupeugòt Undang<sup>2</sup> peue mantông deungòn hana izin Ulèë Peumeurintah Atjèh.
- 1.2.5. Bandum rakjat Atjèh akan geubri keureutu peuturi droë njang barô njang biasa sigohlom peumiléhan bak buleuën April 2006.
- 1.2.6. Partisipasi peunoh bandum ureuëng Atjèh dalam peumiléhan lokal dan nasional, akan geudjamin lagéë na dalam Konstitusi Republik Indonesia.
- 1.2.7. Monitor dari luwa akan geu-undang untôk djak kaloen peumiléhan di Atjèh. Peumiléhan lokal djeuët geupeudjak deungòn beunantu teknik dari luwa.
- 1.2.8. Akan na transparansi peunoh dalam hai biaja kampanye.

### **1.3. Èkonomi**

- 1.3.1. Atjèh na hak mita dana deungòn cara utang luwa nanggroë. Atjèh na hak untôk peuteutap tingkat suku bungong nyang mubida dari peuneutap Bank Sentral Republik Indonesia (Bank Indonesia).
- 1.3.2. Atjèh na hak peuteutap dan kuët padjak daèrah untôk peubiaja keuridja-keuridja dalam naggroë njang reuseumi. Atjèh na hak peudjak buët meuniaga dan bisnis dalam nanggroë dan antarabansa seureuta geutarék investasi dan parawisata aséng sitjara langsông u Atjèh.
- 1.3.3. Atjèh akan na hak-kuasa ateuëh hasé alam njang udép di laôt teritorial di silingka bandum wilajah Atjèh.
- 1.3.4. Atjèh na hak-kuasa ateuëh 70% hasé dari bandum asoë bumoë hidrokarbon (minjeuëk/gas) dan asoë-bumoë alam njang laén njang na sa'at njoë dan bak masa ukeuë di wilajah Atjèh, meunan tjit di laôt teritorial di bandum lingka wilajah Atjèh.
- 1.3.5. Atjèh geupeudjak pembangunan dan administrasi bandum peulabôhan laôt dan peulabôhan udara dalam wilajah Atjèh.
- 1.3.6. Atjèh akan geurasa nikmat meuniaga bibeuëh dengôn bandum bagian Republik Indonesia deungòn hana meutheuën uléh padjak-tjukai atawa hai-hai laén njang djeuët keu halangan.
- 1.3.7. Atjèh akan na hak peugot hubôngan langsông dan deungòn hana meuhalang sapeuë deungòn nangröe<sup>2</sup> aséng, ròt laôt dan udara.
- 1.3.8. Peumeurintah RI meudjandji keubit-bit untôk geupeuna transparansi dalam

hai buët peusapat dan alokasi hasé antara Peumeurintah Pusat dan Atjèh deungòn geuseutudju ngui auditor<sup>2</sup> luwa untôk parékssa dan peusah buët<sup>2</sup> nyan dan keu geupeutrôk hasè-hasèdjih bak Ulèë Peumeurintah Atjèh.

- 1.3.9. GAM akan geutjalon waki-wakigeuh untôk ikôt-saban sitjara peunoh dan dalam bandum tingkat, dalam komisi njang ka geupeuna untôk peudjak buët rekonstruksi lheuëh Tsunami (BRR).

## **1.4. Kuwasa Hukôm**

- 1.4.1. Meuseuti pisah kuasa antara dewan waki rakyat, peumeurintah dan mahkamah.
- 1.4.2. Dewan legislatif Atjèh akan geurumuih keulaji kanun hukôm untôk Atjèh njang meu-ungkheuë ateuuh prinsip-prinsip universal hak asasi manusia lagèë-kiban meutuléh dalam Kovenan<sup>2</sup> Internasional PBB teuntang hai Hak-hak Sipil dan Politik dan keu hai Hak-hak Èkonomi, Sosial dan Budaja.
- 1.4.3. Saboh sistém mahkamah njang hana meupihak dan independen, teumasôk mahkamah ék-bandeng, meuseuti geupeuna untôk Atjèh di dalam sistém peuradélan Republik Indonesia .
- 1.4.4. Angkèe Keupala Pulisi Organik dan djaksa-djaksa meuseuti na izin bak Ulèë Peumeurintah Atjèh. Djak-teurimoëng (recruitment) dan latéhan anggèeta polisi organik dan djaksa-djaksa meuseuti deugòn musyawarah dan izin Ulèë Peumeurintah Atjèh, dan dengòn geupatôh atôran standar nasional.
- 1.4.5. Bandum buët peulanggaran njang djipeulaku ateuëh ureueng sipil uléh aparat militer di Atjèh meuseuti geupeu-adé dalam mahkamah sipil di Atjèh.

## **2. Hak Asasi Manusia**

- 2.1. Peumeurintah RI akan patôh keu Kovenan<sup>2</sup> Internasional PBB teuntang hai Hak-hak Sipil dan Politik dan keu hai Hak hak Èkonomi, Sosial dan Budaja.
- 2.2. Saboh Mahkamah Hak Asasi Manusia akan geupeuna untôk Atjèh.
- 2.3. Komisi „Kebenaran dan Rekonsiliasi“ akan geupeuna untôk Atjèh uléh „Komisi Kebenaran dan Rekonsiliasi“ Indonesia deungòn tugaih djak-rumus dan peuteuntèë upaja rekonsiliasi.

## **3. Amnesti dan reintegrasi u dalam masjarakat**

### **3.1. Amnesti**

- 3.1.1. Peumeurintah RI, sijalan deungòn prosedur konstitusional, akan geubri amnesti keu ban-mandum ureuëng njang rôh dalam keuridja njang meuhubông-kajét deungòn GAM sibagah mungkén dan hana lèwat nibak 15

uroë dari mulai geutanda djaroe Nota Saban-Muphôm njoë.

- 3.1.2. Narapidana dan tahanan politik njang keunong theuën 'akibat konflik meuseuti peubibeueh deungon hana sjarat sibagah mungkén dan siteulat-teulatdjih 15 uroë alheueh geutanda djaroe Nota Saban-Muphôm njoë.
- 3.1.3. Kepala Misi Monitoring akan geupeuputôh kasus-kasus meuseungketa seusuwai deungon nasihat nibak peunasihat hukôm Misi Monitoring.
- 3.1.4. Ureueng GAM njang ngui seundjata álheueh geutanda djaroe Nota Saban-Muphôm njoë akan teuanggap sibagoë peulaku buët meulangga asoë Nota Saban-Muphôm dan hai njan akan peubateue hak amnesti ureueng njan.

### **3.2. Reintegrasi u dalam masjarakat**

- 3.2.1. Sibagoë warga neugara Republik Indonesia, bandum ureueng njang ka meuteumèë amnesti atawa njang ka bibeueh dari tutôpan atawa teupat tahanan laéndjih akan meurumpok keulaji bandum hak-hak politik, ekonomi dan sosial gobnjan seureuta hak untok ikôt seureuta sitjara bibeueh dalam proses politik peukeuh di Atjèh meunan tjit bak tingkat nasional.
- 3.2.2. Ureueng-ureueng njang seulama konflik ka geulutjôt taraf warga neugara Republik Indonesia gobnjan na hak untok geutjok keulaji taraf warga neugara RI njan.
- 3.2.3. Peumeurintah RI dan Peumeurintah Atjèh akan geutjok langkah<sup>2</sup> untok geubantu ureueng-ureueng njang rôh dalam keuridja meuhubông-kajét deungon GAM guna geupeulantja reintegrasi gobnjan u dalam masjarakat. Langkah-langkah njan teumasok tjit fasilitasi ekonomi bagi mantan anggèeta pasokan GAM, tahanan politik njang ka meureumpok amnesti dan keu anggèeta masjarakat njang keunong rugoë. Saboh Dana Reintegrasi di mijuëb kuwasa Peumeurintah Atjèh, akan geupeuna.
- 3.2.4. Peumeurintah RI akan geuseudia dana untok gantoë rugoë hareuta beunda masjarakat dan individu njang ka hantjô atawa rusak 'akibat konflik; dananjan geukeulula uléh Peumeurintah Atjèh.
- 3.2.5. Peumeurintah RI akan geuseudia tanoh meuneugoë dan dana njang meumada keu Peumeurintah Atjèh deungon tudjuwan untok geupeumudah reintegrasi mantan anggèeta pasokan GAM u dalam masjarakat dan kompensasi keu tahanan politik dan keu ureueng sipil njang keunong rugoë. Peumeurintah Atjèh akan geupeumanfa'at tanoh dan dana meunurôt atôran di mijuëb njoë:
  - a) Bandum beukaih anggèeta pasukan GAM akan geubri le Peumeurintah Atjèh tanoh meuneugoë njang patôt, atawa keuridja, atawa djaminan sosial njang lajak meunjo ureueng njan hana keumah lé geukeuridja.
  - b) Bandum tahanan politik njang ka meuteumèë ampôn akan geubri

uléh Peumeurintah Atjèh tanoh meuneugoë njang patôt, atawa keuridja atawa djaminan sosial njang lajak meunjo ureuëng njan hana keumah lé geukeuridja.

- c) Bandum rakjat sipil njang djeuët geupeutunjok bukti rugoë njang djeulaih 'akibat konflik akan meurumpok alokasi tanoh meuneugoë njang patôt, atawa keuridja atawa djaminan sosial njang lajak meunjo ureuëng njan hana keumah lé geukeuridja, dari Peumeurintah Atjèh.

3.2.6. Peumeurintah Atjèh dan Peumeurintah RI akan geupeuna Komisi Bersama peuseuleusoë klaim<sup>2</sup> kompensasi njang keunong tulak.

3.2.7. Anggèeta Pasôkan GAM akan meurumpok hak untök lakèë keuridja sibagoë pulisi atawa teuntra organik di Atjèh deungòn hana diskriminasi dan meunurôt standar nasional.

#### **4. Atôran Keu-amanan**

4.1. Bandum buët dhalém antara pihak-pihak akan meu-akhé palèng liwat bak sa'at geutanda djaroë Nota Saban-Muphôm njoë.

4.2. GAM akan geupeugot demobilisasi ateuëh 3000 droë anggèeta pasôkan militèrgeuh. Anggèeta GAM handjeuët ngui badjèë seuragam atawa peudeuëh emblem atawa lambang militèr lheuh geutanda djaroë Nota Saban-Muphôm njoë.

4.3. GAM geupeudjak peuabéh tugaih (*decommissioning*) bandum seundjata, amunisi dan alat peuleudak nyang na dalam djaroë ureuëng lam tugaih GAM, deungòn beunantu Misi Monitoring Atjèh (AMM). GAM mendjandji djök 840 krèk seundjata.

4.4. Peudjök seundjata GAM akan geumulai bak 15 ub Sèptèmber 2005, njang akan geupeuseuleusoë lam watèë peuët tahap, dan seuleusoë bak 31 ub Dèèsèmber 2005.

4.5. Peumeurintah RI akan geutarék bandum elemen teuntra dan polisi non-organik dari Atjèh.

4.6. Relokasi teuntra dan polisi non-organik akan dimulai bak 15 ub September 2005, dan akan seuleusoë dalam peuët boh tahap, saban taraf lagèë geudjök seundjata GAM, sigra lheuh tiëp tahap geuparékna uléh AMM, dan seuseusoë bak 31 ub Dèèsèmber 2005.

4.7. Djumlah teuntra organik njang teutap na di Atjèh lheuh relokasi nakeuh 14.700 droë. Djumlah keukuwatan pulisi organik njang teutap na di Atjèh lheuh relokasi nakeuëh 9.100 droë.

4.8. Teuntra Indonesia handjeuet meugrak itjara ramé-ramé lheuh geutanda djaroë Nota Saban-meuphôm njoyoe. Bandum grak leubèh nibak djumlah

saboh peuleuton peureulëë brithëë awai dilëë bak Ulëë Misi Monitoring.

- 4.9. Peumeurintah RI tjok buët untök peusapat bandum seundjata illegal, amunisi dan alat peuleudak njang djingui uléh tiép keulompok dan pihak-pihak illegal soë mantoëng.
- 4.10. Pulisi organik akan meutangông djaweuëb untök Peudjalan hukôm dan atôran di Atjèh.
- 4.11. Teuntra akan meutangông djaweuëb untök djaga peurtahanan luar mantong. Dalam keuada'an watëë damè njang normal, teuntra organik mantông njang djeuët na di Atjèh.
- 4.12. Anggèëta polisi organik Aceh meuteumeuëng latéhan khusus di Atjèh dan di luwa nanggroë deungòn geufokus bak geubri horeumat keu hak asasi manusia.

## **5. Peuna Misi Monitoring Atjèh**

- 5.1. Misi Monitoring Atjèh (AMM) akan geupeuna uléh Uni Èropa dan nanggroë-nanggroë ASEAN njang ikôt seureuta deungòn mandat geudjaga buët njang ka geumeudjandji peugòt uléh banduwa pihak lagëë dalam Nota Saban-muphôm njoë.
- 5.2. Tugaih AMM nakeuëh untök:
  - a) geumonitor *demobilisasi* dan *decommissioning* seundjata GAM.
  - b) geumonitor relokasi teuntra dan polisi non-organik.
  - c) geumonitor reintegrasi angèëta-angèëta GAM njang aktif u dalam masjarakat.
  - d) geumonitor situwasi hak asasi manusia dan geubri beunantu dalam bideuëng njan.
  - e) geumonitor proses peu-ubah undang-undang.
  - f) geupeuseuleusoë kasus-kasus amnesti njang meupeukara.
  - g) geuseulidék dan geupeuseuleusoë peukara ureuëng njang djak-meungadu dan njang teutudôh meulangga Nota Saban-Muphôm njoë.
  - h) geupeuna dan geupeulhara hubôngan dan keuridjasama njang djroh deungòn banduwa pihak.
- 5.3. Status Mission Agreement (Peusah Status Missi-SoMA) antara Peumeurintah RI dan Uni Èropa akan geutanda djaroë teuma òh lheuh geutanda djaroë Nota Saban-Muphôm. SoMA nyang bôh definisi status, hak-hak istimewa, dan hak keubai-hukôm AMM dan angèëta-angèëtageuh. Nanggroë<sup>2</sup> ASEAN njang ikôt seureuta dan njang ka geu-undang uléh Peumeurintah RI meuseuti geupeusah teurimóng tugaih dan teurimóng tundök keu SoMA sitjara meutuléh.
- 5.4. Peumeurintah RI akan geubri dukôngan peunoh untök peudjalan mandat AMM. Keu meukeusuët njan, Peumeurintah RI akan geutuléh surat keu Uni Èropa dan keu nanggroë-nanggroë ASEAN njang ikôt seureuta dan

geupeunjata dukôngan dan komitmen keu AMM.

- 5.5. GAM akan geubri dukôngan peunoh untôk peudjalan mandat AMM. Keu meukeusuët njan, Peumeurintah RI akan geutuléh surat keu Uni Éropa dan keu nanggroë<sup>2</sup> ASEAN njang ikôt seureuta dan geupeunjata dukôngan dan komitmen keu AMM.
- 5.6. Ban duwa pihak geumeudjandji untôk geupeugot kondisi keuridja njang aman, seulamat dan stabil bagi AMM dan geupeunjata keureudjasama sitjara peunoh deungòn AMM.
- 5.7. Tim monitoring na hak bibeuëh meugrak njang hana meubataih di Atjèh. Tjuma tugaih-tugaih njang meutuléh dalam Nota Saban-Muphôm njoëkeuh njang akan geuteurimong uléh AMM. Banduwa pihak hana hak veto teuhadap tindakan atawa kontrol ateuëh keuridja<sup>2</sup> operasional AMM.
- 5.8. Peumeurintah RI meutangông djaweuëb ateuëh keuamanan bandum ureuëng AMM di Indônësia. Ureuëng AMM han geumé seundjata. Bahpihmeunan ulëë Misi Monitoring djeuët geutjok peunutôh dalam hai-hai meuteuentèë han geutuëng dji-iréng uléh pasôkan meuseundjata Peumeurintah RI. Dalam hai njoë, Peumeurintah RI akan geubrithèë uléh AMM dan akan hana meutangông djaweuëb ateuëh keu-amanan patroli njan.
- 5.9. Peumeurintah RI akan geupeuna teumpat-teumpat peu-kumpôi seundjata dan geudukông tim-tim peusahoë seundjata meugrak (mobile team) dan geukeuëridja-sama deungòn GAM.
- 5.10. Keuridja peuhantjô seundjata sigra akan geupeulaku lheuë seundjata dan amunisi nyan meukumpôi. Proses njoë akan teudokumentasi sitjara peunoh dan teupublikasi meunurôt njang patôt.
- 5.11. AMM geulapôr bak ulëë Misi Monitoring njang akan geubri lapôran rutin bak banduwa pihak dan bak pihak laén meunurôt peureulëë, meunan tjit keue ureuëng atawa kantô njang geutunjok uléh Uni Éropa dan naggroë-nanggroë ASEAN njang ikôt seureuta.
- 5.12. Lheuë geutanda djaroë Nota Saban-Muphôm njoë tiëp pihak akan geutunjok sidroë waki senior untôk geutjok tugaih dalam bandum hal ihkwal njang meusangkôt deungòn peudjak-buët Nota Saban-Muphôm njoë deungòn Ulëë Misi Monitoring.
- 5.13. Banduwa pihak meudjandji untôk peudjak tanggông-jaweuëb prosedur brithèë bak AMM, teumasôk isu-isu militèr dan rekonstruksi.
- 5.14. Peumeurintah RI akan geubri kuasa tjok langkah<sup>2</sup> peureulëë njang meusangkôt deungòn khidmad medis darurat dan rawartan di reumoh sakét bagi tiëp<sup>2</sup> ureuëng AMM.
- 5.15. Untôk geudukông transparensi, Peumeurintah RI akan geubri izin akses njang peunoh keu waki<sup>2</sup> media nasional dan internasional di Atjèh.



## 6. Peuseuleusoë dawa-dawi.

6.1. Miseuë djeuët keu paké meusangkôt deungòn peudjak-buët Nota Saban-Muphôm njoë, sigra akan geupeuseuleusoë deungòn tjara lagèë di mijub njoë:

- a) Sibagoë saboh atôran, meuseuliséh/dawa njang djeuët keu karu bak peudjak-buët Nota Saban-Muphôm njoë akan geupeuseuleusoë uléh Ulèë Misi Monitoring, deungòn tjara musjawarah deungòn banduwa pihak dan bandum pihak geubri keuteurangan njang peureulèë deungòn sigra. Ulèë Misi Monitoring akan geutjok peuneutôh njang akan meukat banduwa pihak.
- b) Meunjoë Ulèë Misi Monitoring geutjok saboh peunutôh bahwa peukara meuseuliséh njan handjeuët geupeuseuleusoë lagèë njang meutuléh di ateuëh, maka hai njan akan geubahaih saban<sup>2</sup> uléh Ulèë Misi Monitoring deungòn waki<sup>2</sup> senior dari tiëp-tiëp pihak. Lheuëh njan teuma, Ulèë Misi Monitoring akan geutjok peuneutôh njang akan meukat banduwa pihak.
- c) Bagi kasus-kasus dawa-dawi njang han keumah geupeuseuleusoë deungòn salah saboh tjara lagèë ka meutuléh di ateuëh, maka Ulèë Misi Monitoring akan geulapor sitjara langsông bak Meuntroë Koordinator Politik Hukôm dan Keu-amanan Republik Indonesia, dan bak Pimpinan Politik GAM dan bak Keutuha Dewan Direktur *Crisis Management Initiative*, seureuta geubrithèë bak Komite Politik dan Keu-amanan Uni Èropa. Lheuëh geukonsultasi deungòn banduwa pihak, Ulèë Dewan Direktur *Crisis Management Initiative* akan geutjok peuneutôh njang meukat banduwa pihak.

Peumeurintah RI dan GAM akan han geutpeugòt buët njang hana konsisten deungòn nyang meutuléh atawa ngòn seumangat Nota Saban-Muphôm njoë.

\*\*\*

Geutandajaroë dalam rangkap lhèë di Helsinki, Finland, bak uroë Seulanjan, 15 ub Agustus 2005.

A.n. Peumeurintah Republik Indonesia ,

A.n. Geurakan Atjèh Meurdéhka,

Hamid Awaluddin  
Meuntroë Hukôm dan HAM

Malik Mahmud  
Pimpinan GAM

Geusaksi uléh,

Martti Ahtisaari  
Mantan Présidèn Finland  
Keutuha Dewan Direktur *Crisis Management Initiative*  
Fasilitator proses perundingan